



Broj: 01-227/13
Vareš, 31.07.2013. godine

Na osnovu člana 14. tačka 4. Zakona o mladima Federacije Bosne i Hercegovine („Službene novine Federacije BiH“, broj 36/10), člana 13. Zakona o principima lokalne samouprave u Federaciji Bosne i Hercegovine („Službene novine Federacije BiH“, broj 49/06), člana 22. Statuta općine Vareš – Prečišćeni tekst, broj 01-162/12 od 11.09. 2012. godine, Općinsko vijeće Vareš na 10. sjednici, održanoj 31.07. 2013. godine d o n o s i

O D L U K U
o kriterijima, načinu i postupku
raspodjele sredstava iz granta za projekte
mladih koji se finansiraju i sufinansiraju
sredstvima budžeta općine Vareš

Član 1.

Ovom Odlukom utvrđuju se jedinstveni kriteriji, način i postupak raspodjele budžetskih sredstava općine Vareš iz granta za projekte mladih.

Član 2.

(1) Sredstva iz člana 1. ove Odluke dodjeljuju se:

- omladinskim udruženjima .
- fondacijama koje rade za mlade.
- vijećima učenika u srednjim školama.
- neformalnim grupama mladih (uz administrativnu podršku udruženja sa sjedištem na području općine Vareš), koji su registrovani u Bosni i Hercegovini, imaju sjedište na području općine Vareš, a čiji projekti su kandidovani za finansiranje iz budžeta općine Vareš i provode se u interesu i u skladu sa „Strategijom prema mladima općine Vareš 2013 – 2016“ na području općine Vareš.

(2) Sredstva se mogu dodijeliti i omladinskim udruženjima, fondacijama i neformalnim grupama čije je sjedište na području druge općine, pod uvjetom da se projekt kojim se aplicira realizuje u interesu općine Vareš i u potpunosti na području općine Vareš i u partnerstvu sa jednom od nevladinih organizacija sa područja općine Vareš.

Član 3.

(1) Sredstva se dodjeljuju na osnovu Javnog poziva koji objavljuje Općinski načelnik na prijedlog Službe za društvene djelatnosti i BiZ.

(2) Javni poziv za raspodjelu sredstava objavljuje se u dnevnim novinama koje izlaze na području Zeničko – dobojskog kantona, oglasnoj tabli Općine Vareš, web stranici Općine i putem radija Bobovac, najkasnije 30 dana od dana usvajanja Budžeta općine Vareš.

(3) Javni poziv za raspodjelu sredstava traje 15 dana od dana objavljivanja u sredstvima informisanja.

(4) Prioritetne oblasti za projekte bit će navedene u Javnom pozivu i moraju biti u skladu sa aktivnostima iz „Strategije prema mladima općine Vareš 2013-2016“.

Član 4.

(1) Odabir projekata za finansiranje sredstvima budžeta općine Vareš vrši Komisija koju imenuje općinski načelnik (u daljem tekstu Komisija).

(2) Komisiju čini predsjednik i četiri člana.

(3) Dva člana Komisije imenuju se iz reda državnih službenika Službe za društvene djelatnosti i BiZ (u daljem tekstu BiZ), dva člana iz Komisije za pitanja mladih Općinskog vijeća Vareš i jedan član Komisije iz reda nevladinih omladinskih organizacija. Nevladina omladinska organizacija čiji je član u Komisiji nema pravo kandidovati projekte.

(4) Stručne i administrativno – tehničke poslove za potrebe Komisije obavljat će Služba za društvene djelatnosti i BiZ.

U radu Komisije mogu učestvovati stručna lica iz oblasti za koje se projekte traže sredstva..

Član 5.

(1) Subjekti iz člana 2. ove Odluke podnose prijavu Komisiji na objavljeni Javni poziv.

(2) Prijava treba sadržavati:

a) Za udruženje i fondacije:

- popunjen prijavni obrazac,
- rješenje o registraciji (ovjerena kopija),
- uvjerenje o poreznoj registraciji (ovjerena kopija),
- transakcijski račun (kopija ugovora s bankom ili potvrda banke),
- projekt kojim udruženje/fondacija aplicira za dodjelu sredstava, s jasnom definicijom ciljeva, ciljne grupe, očekivanim rezultatima, aktivnostima, detaljnom specifikacijom troškova, vremenskim planom provođenja aktivnosti, načinom praćenja realizacije projekta, vrednovanje i mjerenje zadovoljstva korisnika, održivost projekta, te način na koji će aplikant informisati javnost o aktivnostima realizacije projekta, bilans stanja i uspjeha za proteklu godinu ovjeren kod nadležnog organa (ovjerena kopija),
- za projekte koji se provode u školama dostaviti pisanu saglasnost direktora škole, odnosno nadležnog ministarstva.

b) Za Vijeća učenika u srednjoj školi općine Vareš:

- popunjen prijavni obrazac,
- pisana saglasnost direktora škole da Vijeće učenika aplicira za dodjelu sredstava,

- transakcijski račun sindikalne organizacije u školi (kopija ugovora s bankom ili potvrda banke),
 - projekt kojim Vijeće učenika aplicira za dodjelu sredstava, s jasnom definicijom ciljeva, ciljne grupe, očekivanim rezultatima, aktivnostima, aktivnosti, detaljnom specifikacijom troškova, vremenskim planom provođenja aktivnosti, načinom praćenja realizacije projekta (vrjednovanje i mjerenje zadovoljstva korisnika, održivost projekta, te način na koji će aplikant informisati javnost o aktivnostima realizacije projekta).
- c) Za neformalne grupe:
- popunjen prijavni obrazac,
 - rješenje o registraciji (ovjerena kopija) omladinske organizacije koja daje administrativnu podršku sa sjedištem na području općine Vareš
 - biografije članova neformalne grupe,
 - transakcijski račun udruženja koje daje administrativnu podršku sa sjedištem na području općine Vareš (kopija ugovora s bankom ili potvrda banke),
 - kratak opis grupe sa podacima o prethodno realizovanim projektima i kvalifikaciji kadrova koji implementiraju projekat (odgovorne osobe, saradnici, volonteri)
 - projekt kojim grupa aplicira za dodjelu sredstava, s jasnom definicijom ciljeva, ciljne grupe, očekivanim rezultatima, aktivnostima, aktivnosti, detaljnom specifikacijom troškova, vremenskim planom provođenja aktivnosti, načinom praćenja realizacije projekta (vrjednovanje i mjerenje zadovoljstva korisnika, održivost projekta, te način na koji će aplikant informisati javnost o aktivnostima realizacije projekta,
 - za projekte koji se provode u školama dostaviti pisanu saglasnost direktora škole, odnosno nadležnog ministarstva.

(3) Aplikant može tražiti ukupan iznos vrijednosti projekata ili dio nedostajućih sredstava, što je dužan naznačiti u zahtjevu.

(4) Aplikant može aplicirati neograničenim brojem projekata, te može biti podržano više njegovih projekata.

(5) Ukoliko aplikant kojem su dodijeljena sredstva po javnom pozivu za prethodnu godinu nije dostavio izvještaj iz člana 13. ove odluke ne može učestvovati u raspodjeli sredstava za tekuću godinu.

Član 6.

Prijavni obrazac podnosi ovlašteno lice aplikanta i sadrži:

- naziv projekta,
- puni naziv aplikanta (sjedište, adresa, telefon/faks i e-mail),
- oblik, datum, broj i mjesto registracije (za udruženja i fondacije)
- broj transakcijskog računa,
- ime i prezime odgovorne osobe za provođenje projekta i njene kontakte,
- kratak opis aplikanta (npr. misija, vizija i područje djelovanja),
- oblast na koju se odnosi projekt i opis konkretnog problema koji se rješava provođenjem projekta,
- iznos cijelog projekta i udio koji se traži iz budžeta općine Vareš,
- ostalo (dodatne informacije o projektu, partnerima i budućim aktivnostima).

Član 7.

(1) Uputstvo za aplikante, kriteriji i prijava projekata za finansiranje sredstvima iz budžeta Općine Vareš, bit će objavljeni na web-stranici općine Vareš i dostupni na info pultu općine Vareš, te će biti objavljeni u sredstvima javnog informisanja.

(2) Prijave s dokumentacijom podnose se Službi za društvene djelatnosti i BIZ s naznakom "Za Komisiju za dodjelu grantova za mlade", s navedenom adresom, lično ili poštom.

Član 8.

Općinski načelnik vrši odabir projekata na osnovu prijedloga Komisije iz člana 4. ove odluke, koji je sačinjen u skladu sa sljedećim kriterijima:

a) Pozitivni kriteriji

- da se projekt odnosi na sve kategorije mladih općine Vareš i da će se provesti na njenom području,
- da je ispoštovana procedura za pisanje projekta,
- da je jasno definisana ciljna grupa i da obuhvata veći broj korisnika usluga s jednakom kvalitetom isporuke,
- da su očekivani rezultati mjerljivi, realni i ostvarivi,
- da angažuje ili ima kao ciljnu grupu marginalizirane grupe (npr., osobe s onesposobljenjem, Rome, nacionalne manjine, socijalno ugrožene grupe itd.),
- da kao fokus ima ljudska prava, demokratiju, rad s mladima i politiku prema mladima, građanski aktivizam, ekologiju, zdrav način življenja, borbu protiv ovisnosti, seksualno reproduktivno zdravlje i slično,
- da mladi provode sve aktivnosti ili dio njih,
- da je budžet realan i u skladu s aktivnostima.

b) Eliminatorski kriteriji

- Projekt nije dostavljen u naznačenom roku,
- nedostaju formalni uvjeti za kandidovanje projekta (nepotpuna ili netačna dokumentacija),
- nije opravdan utrošak sredstava za ranije odobrene projekte (nije dostavljen finansijski i narativni izvještaj o provođenju ranije odobrenih projekata),
- da projekt ne angažuje kvalitetno osoblje, članstvo ili volontere za njegovo provođenje,
- sve aktivnosti se događaju van općine Vareš,
- prijavni obrazac nije popunjen u potpunosti,
- projektom se podržava rad političke stranke,
- projekt ne promovira rad s mladima, politiku prema mladima i volonterstvo,
- nedostaju ključne informacije o projektu,
- omladinsko udruženje/neformalna grupa nije na općinskom popisu omladinskih udruženja.

Član 9.

(1) Za ocjenu projekata na osnovi pozitivnih kriterija koristi se skala od 1 do 5 bodova za svaki od kriterija.

(2) Svaki član Komisije dodjeljuje bodove za svaki od kriterija pojedinačno. Konačna ocjena bodova predstavlja zbroj bodova svih članova Komisije.

(3) Ukoliko se članovi ne usaglase oko nekog od eliminatorskih kriterija, konačna odluka se donosi na osnovi većine glasova svih članova Komisije.

(4) Komisija konačnu ocjenu svakog projekta vrši na obrascu za Komisiju.

Član 10.

Obrazac za Komisiju sadrži:

- a) naznaku podržava li se projekt u cijelosti ili samo jedan njegov dio,
- b) ocjenu projekta na osnovi skale ocjenjivanja po kriterijima iz člana 9. ove odluke koju popunjavaju članovi Komisije,
- c) naznaku da se projekat odbija (u slučaju da nisu ispunjeni kriteriji),
- d) rubriku s obrazloženjem odbijanja projekta (u slučaju odbijanja),
- e) rubriku Ostalo za dodatna mišljenja i obrazloženja vezana za projekt (od važnosti za Komisiju), a čije vrjednovanje nije propisano u kriterijima, kao i preporuku Komisije za Općinskog načelnika.
- f) potpise predsjednika i svih članova Komisije.

Član 11.

(1) Komisija donosi prijedlog odluke o raspodjeli sredstava rukovodeći se ocjenom projekta na osnovi kriterija propisanih u članu 8. ove odluke. U slučaju da dva ili više projekta dobiju isti broj bodova, a raspoloživa sredstva nisu dovoljna za njihovo finansiranje, Komisija većinom glasova vrši odabir projekta za finansiranje.

(2) Komisija je dužna pripremiti Prijedlog odluke o raspodjeli sredstava i dostaviti je općinskom načelniku u roku od 15 dana od dana isteka roka Javnog poziva za prijavu projekata. **Konačnu odluku o raspodjeli sredstava donosi Općinski načelnik.**

(3) Odluku o raspodjeli sredstava iz stava (2) ovog člana Općinski načelnik će objaviti na službenoj web-stranici i oglasnoj tabli Općine Vareš i dostaviti je putem Komisije u pisanom obliku svakom aplikantu pojedinačno.

Član 12.

(1) Nakon donošenja Odluke o raspodjeli sredstava, Općinski načelnik zaključuje ugovor sa subjektima iz člana 2. Ove odluke, koji sadrži prava, obaveze i odgovornosti, način praćenja provođenja odobrenog projekta, način praćenja namjenskog trošenja sredstava, te elemente narativnog i finansijskog izvještavanja o provođenju projekta.

(2) Sredstva će biti doznačena nakon potpisivanja ugovora, jednokratno ili u ratama, u skladu s prilivom budžetskih sredstava općine Vareš.

Član 13.

Aplikanti kojima su dodijeljena sredstva za projekte podnose narativni i finansijski izvještaj o provođenju Općinskom načelniku najkasnije 30 dana nakon provođenja projekta odnosno najkasnije do kraja kalendarske godine.

Član 14.

Provođenje zaključenih ugovora za odobrene projekte iz člana 12. stav (1) ove odluke prati Služba za društvene djelatnosti i BIZ, a kontrolu utroška sredstava Služba za privredu, finansije i budžet općine Vareš.

Član 15.

Sve imenice upotrijebljene u ovoj Odluci samo u muškom ili ženskom rodu, odnose se na oba spola.

Član 16.

Ova Odluka stupa na snagu osmog dana od dana objavljivanja na oglasnoj tabli općine Vareš.

**PREDSJEDAVAJUĆI
OPĆINSKOG VIJEĆA**

Zdravko Marošević

Odluka objavljena na oglasnoj tabli općine Vareš, dana 01.08. 2013. godine.

OPĆINSKI NAČELNIK

Kovačević Avdija dipl. pravnik

O B R A Z L O Ž E N J E

Pravni osnov

Pravni osnov za donošenje ove Odluke sadržan je u članu 14 tačka 4. Zakona o mladima Federacije Bosne i Hercegovine („Službene novine F BiH“, broj 36/10), je utvrđeno: „Općinski, gradski i kantonalni organi vlasti dužni su samostalno osigurati minimum mjera na planu rada sa mladima i omladinskih aktivnosti, kao i mehanizme i kapacitete koji uključuju: osiguranje godišnjih grantova za projekte za mlade dodjeljujući ih putem javnog poziva s kriterijima, u skladu s Evropskim principima u radu javnih uprava“. Članom 13. Zakona o principima lokalne samouprave u Federaciji Bosne i Hercegovine („Službene novine FBiH“, broj 49/06) i članom 22. Statuta općine Vareš – Prečišćeni tekst, broj 01-162/12. od 11.09.2012. godine utvrđena je nadležnost donošenja propisa od strane Općinskog vijeća.

Razlozi za donošenje

U Programu rada Općinskog načelnika za period 2012 – 2016 navedeno je da će „Općinski načelnik podržati sve projekte koji tretiraju poboljšanje položaja mladih u općini Vareš“. Da bi se mogle implementirati aktivnosti iz Programa rada Općinskog načelnika prema poboljšanju položaja mladih, osmišljavanju i realizaciji projekata koji se odnose na uključivanje mladih putem realizacije različitih projekata, potrebno je s tim u vezi donijeti ovu Odluku kako bi se izvršila transparentna raspodjela sredstava za predložene projekte, te animirala mlade da se ispred Udruženja koje predstavljaju aktivno uključe u apliciranje za dodjelu sredstava iz budžeta Općine.

Finansijska sredstva

Za realizaciju ove Odluke potrebna su finansijska sredstva i ista su planirana u budžetu Općine Vareš za 2013. godinu.

**PREDLAGAČ
OPĆINSKI NAČELNIK**

Kovačević Avdija dipl. pravnik